

Allanguutissatut siunnersuut

Uunga

Siunnersuut uunga: Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat nr. xx, xx. xxx 2016-imeersoq

Aappassaaneerinntoqarnissaanut Naalakkersuisunit saqqummiunneqartoq.

§ 3-imut

1. § 3, imm. 1 ima oqaasertalerneqassaaq:

"Nikingassutaagallartup piffissami ungasinngitsumi aningaasaqarnikkut atasinnaassuseq ulorianartorsiortissanngippagu immikkorluinnaq pisoqartillugu § 2, imm. 1-mi piumasaqaatip taaneqartup saneqqunnissaanut Naalakkersuisut inassuteqareernerisigut Inatsisartut Aningaasaqarnermut Akileraartarnermullu Ataatsimiititaliaat akuersissuteqarallarsinnaavoq."

§ 4-imut

2. § 4 ima oqaasertalerneqassaaq:

"Naalakkersuisoq taanna Naalakkersuisut Siulittaasuata erseqqinnerusumik aalajangersaaneratigut tamatumunnga piginnaatinneqartoq ukiut tamaasa apriilip naalernerani ukiuni aningaasanut inatsiseqarfiusuni 4-ni tulliuuttuni inernilunneqartunut § 2, imm. 2, nr. 2 aamma 3-mi taaneqartunut missingersuusianut killiliussanullu naatsorsuutinik suliaqassaaq."

§ 6-imut

3. § 6 ima oqaasertalerneqassaaq:

"§ 6. Naalakkersuisut inissianut, inuussutissarsiuutinut attaveqaatinullu suliniutinut aatsaat taarsigassarsinnaallutilluunniit taarsigassarsinissamut akuersisinnaapput, atuisut akiliutaat, pisortat aningaasartuutaasa annikilliat pisortalluunniit kinguneqaatit isertinneruligassaasa minnerpaamik taarsigassarsiamut atasumik erniat taarsersuutitullu akiliutit matussusersinnaappasigut. Taamattaaq aningaasaliissutit taneqartut ungasissumik isigisumik aningaasarsiornermut politikip attanneqarsinnaaneranut ikiorfartuisuussapput.

imm. 2. Imm. 1 aamma aningaasalersueriaatsini tulliuuttuni atoneqassaaq:

- 1) akiitsunik pisussaaffinnik tigusinerni
- 2) qularnaveeqqutinik pisussaaffinngoratarsinnaasunik allanik tigusinerni,
- 3) aningaasatigut attartornermik isumaqatigiissuteqarnermi, imaluunniit
- 4) pisortat namminersortullu suleqatigiinnerannik il.il. isumaqatigiissusiornerni

Imm. 3. Imm. 1-imi 2-milu taaneqareersutut taarsigassarsititsisoqarnissaani taarsigassarsinissaq taarsigassarsianillu akuersinissaq il.il. pillugit malittarisassanik erseqqinnerusunik Naalakkersuisut aalajangersaasinnaapput.”

§ 12-imut

4. § 12, imm. 3 ima oqaasertalerneqassaaq:

"Imm. 3. Oqaasertaliussat aqutugalugit inatsimmut atuuttumut aalajangersakkanik tigussaasunik allanik ilanngussisoqarsinnaavoq. Oqaasertaliussat aqutugalugit inatsisunik atuuttunik allanngueq immikkorluinnaq pisoqartillugu, allannguitissallu piffissamut aalajangersimasumut atuuppata aatsaat pisinnaavoq.”

Immikkoortunut qulequtsiineq

5. § 13-ip kingornagut qulequtaq ima isikkoqassaaq:

”Sanaartornerit, iluarsagassat il.il.”

§ 14-imut

6. § 14 imatut oqaasertalerneqassaaq:

”§ 14. Aningaasanut Inatsisissatut Siunnersuut Namminersorlutik Oqartussat sanaartugassaasa iluarsagassaasalu pilersaarusiornissaannut aningaasaliissutissanut siunnersuutininik imaqarpoq.

Stk. 2. Aningaasanut Inatsisissatut Siunnersuut Namminersorlutik Oqartussat sanaartugassaasa iluarsagassaasalu suliarinissaannut aningaasaliissutissanut siunnersuutininik imaqarpoq.”

§ 15-imut

7. § 15 imatut oqaasertalerneqassaaq:

”§ 15. Aningaasanut Inatsisissatut Siunnersuut Namminersorlutik Oqartussat illuutininut aalaakkaasunut, sanaartortitsinernut suliaannullu allanut aningaasaliissutissanut siunnersuutininik imaqarpoq.

Imm. 2. Aningaasanut Inatsisissatut Siunnersuut Namminersorlutik Oqartussat sanaartortitsinissanut iluarsagassanullu taarsigassarsititsisoqarnissaanut neriorsuutaannut aningaasaliissutissanut siunnersuutininik imaqarpoq.

Imm. 3. Aningaasanut Inatsisissatut Siunnersuut Namminersorlutik Oqartussat sanaartortitsinissanut iluarsagassanullu tapiissuteqarnissaannut aningaasaliissutininut siunnersuutininik imaqarpoq.”

§ 16-imut

8. § 16 imatut oqaasertalerneqassaaq:

”§ 16. Aningaasaliissutit § 14 aamma § 15-imi taaneqartut atornissaat pillugit Naalakkersuisut ukiumoortumik nassuiaammik Inatsisartunukartussamik suliaqartassapput. Nassuiaat ilaatigut suliniutit nutaat, suliniutit aallartinneqartut aamma suliniutit naammassineqartut unitsinneqartulluunniit pillugit immikkut killiffimmik imaqassaaq.”

§ 17-imut

9. § 17 imatut oqaasertalerneqassaaq:

”§ 17. Atuinikinnerusoqarneranut sanaartortitsinerit imaluunniit iluarsaanerit kinguaattoorfiusimanerat pissutaasimappata aningaasaliissutit taaneqartut ukiumoortumik aningaasanut inatsiseqarfiusunut tulliuttunut § 14 aamma § 15-imi taaneqartunut nuunneqarnissaat pillugit malittarisassanik Naalakkersuisut aalajangersaasinnaapput.”

§ 18-imut

10. § 18, imm. 7 ima oqaasertalerneqassaaq:

”Piffissaq Ungasinnerusoq Eqqarsaatigalugu Aningaasaliissuteqarnissamut Aningaasaateqarfiup ingerlaavartumik aqunneqarnera Naalakkersuisut Siulittaasuata erseqqinnerusumik aalajangersaaneritigut naalakkersuisumut tunniunneqassaaq.”

§ 20-imut

11. § 20, stk. 3, imaalissaaq:

“Imm. 3. Ukiumoortumik missingersuutit aningaasartuutissatut isertitassatullu aamma nikerartussanut allanut ilimagineqartunut tamatigut takussutissaassaaq. Kommunitut ataatsimoortumik tapiissutinik tunniussisoqarneranut atatillugu siunertanut aalajangersimasunut erseqqinnerusunut aningaasanik immikkoortitsisoqarnissaanut isumaqatigiissuteqartoqarsimappat ukiumoortumik missingersuutini ikinnerpaamik aningaasanik taakkuningga siunertanut pineqartumut immikkoortitsisoqassaaq.”

§ 21-imut

12. § 21, imm. 2 ima oqaasertalerneqassaaq:

”Ukiumoortumik missingersuutitut siunnersuut kommunip nittartagaatigut tamanut saqqummiunneqassaaq peqatigitillugulu siunnersuut siullermeerneqartussanngorlugulu aappassaaneerneqartussanngorlugulu kommunalbestyrelsip ilaasortaanut nassiunneqarluni. Siunnersuut aamma Naalakkersuisunut ilisimatitsissutitut nassiunneqassaaq.”

§ 24-imut

13. § 24 ima oqaasertalerneqassaaq:

”§ 24. Imm. 2-mi malittarisassatut aalajangersakkat apeqquaatillugit kommunit Naalackersuisunit akuerineqarnatik:

- 1) taarsigassarsisinnaanngillat allanillu akiitsunik pisussaaffilersinnaanatik,
- 2) qularnaveeqqussisinananatik aallanillu pisussaaffinngoratarsinnaasunut tigusisinnaanatik,
- 3) attartartorsinnaanatik leasinginillu isumaqatigiissuteqarsinnaanatik,
- 4) pisortat namminersortullu suleqatigiinnerannik il.il. isumaqatigiissussiorsinnaanatik, imaluunniit
- 5) aalajangersimasumik akiliutigisartakkamik assigisaanilluunniit neriorsuinnaanngillat, kommunit inatsisit naapertorlugu isumagisassarinnngisaannik.

Stk. 2. Naalackersuisut malittarsiassanik, kommunit erseqqissumik aalajangersarlugit killiliussani iluanni imm. 1-imi taarsigassarsisinnaanermik il.il. pisinnaatitsisunik aalajangersaassapput. Naalackersuisut tassani pisinanatitsissummi, kommunit aningaasaqarnermik, missingersuutunik il.il. aqutsinerneramik piumasagaatinik naammassinninnissaat tunngavissaatissinnaavaat”

§ 25-imut

14. § 25 imatut oqaasertalerneqassaaq:

“§ 25. Kommunit Naalackersuisullu tamarmik ukiumi aningaasanut inatsiseqarfiusumi piffissani aalajangersimasuni naatsorsuutit, paasissutissat allat aamma kommunip pineqartup oqartussaaffeqarfiilluunniit ataasiakkaat ukiumut aningaasanut inatsiseqarfiusumut tunngatillugu naatsorsuumminnik kingullernik misissuisimanermi naliliinerat pigineqartut tunngavigalugit ukiumi aningaasanut inatsiseqarfiusumi aningaasaliissutissat sinnerlugit atuisoqassanersoq nakkutigissavaat.

Imm. 2. Kommunip Naalackersuisulluunniit imm. 1 malillugu aningaasartuutunik nakkutilliinerisigut paasinarsippat kommunip pineqartup imaluunniit Namminersorlutik Oqartussat ukiumut aningaasanut inatsiseqarfiusumut inaarutaasumik naatsorsuutaasa ukiumi aningaasanut inatsiseqarfiusumi aningaasaliissutissat sipporsinnaagaat, taava kommuni pineqartoq Naalackersuisorluunniit ukiumi aningaasanut inatsiseqarfiusumi aningaasaliissutit sippuisussat naatsorsuutigineqartut matussuserneqarnissaat anguniarlugu iliuuseqartoqarnissaannik aalajangiissapput.”

§ 26-imut

15. § 26 imatut oqaasertalerneqassaaq:

”§ 26. Kommunit Naalackersuisullu tamarmik ukiumi aningaasanut inatsiseqarfiusumi piffissani aalajangersimasuni erseqqinnerusuni § 25, imm. 1 malillugu aningaasartuutunik kingullermik nakkutilliinermi inernerit pillugit aamma § 25, imm. 2 malillugu aalajangiisinaanerup imarisai erseqqinnerusut pillugit naalackersuisumut Naalackersuisut Siulittaasuannit erseqqinnerusumik aalajangersaanikkut immikkut tassunga piginnaatinneqartumut paasissutissanik nalunaaruteqartassapput.

Imm. 2. Imm. 1-imi taaneqartutut kommuni nalunaaruteqarsimangippat Naalakkersuisup Siulittaasuata tassunga piginnaatitsineranut aalajangersakkat erseqqinnerusut malillugit naalakkersuisuutitaq nalunaassaaq kommuni ullut suliffiusut 10-t qaangiutsinnagit nalunaaruteqassasoq. Piffissamut killiliusaaq qaangerneqarpat nalunaaruteqartoqarnissaa tikillugu kommuninut ataatsimoortumik tapiissutit tunniunneqartussat 10 procentii uninngatinneqassapput. Nalunaaruteqartoqarpat ataatsimoortumik tapiissutit uninngatinneqartut tunniunneqassapput.

Imm. 3. Paasissutissat tunngavigalugit naalakkersuisoq Naalakkersuisup Siulittaasuata erseqqinnerusumik malittarisassat malillugit tassunga piginnaatitaata ukiumut aningaasanut inatsiseqarfiusumut kommunit Namminersorlutillu Oqartussat aningaasartuutaannut naatsorsuutini kisitsisit kingulliit isertitariumaakkanut sippuissanersut nakkutigissavai. Naalakkersuisoq taanna Naalakkersuisup Siulittaasuata aalajangersakkat erseqqinnerusut malillugit tassunga piginnaatitaa nakkutilliinissamut atugassanik paasissutissanik kommuninut piniarsinnaavoq.

Imm. 4. Imm. 3 naapertorlugu aningaasartuutininik nakkutilliinermi paasineqarpat ukiumi aningaasanut inatsiseqarfiusumi kommunit Namminersorlutilluunniit Oqartussat aningaasartuutaat pillugit inaarutaasumik naatsorsuutit kommunit Namminersorlutilluunniit Oqartussat ukiumi aningaasanut inatsiseqarfiusumi isertitaasa 2,5 procentii sinnerlugit sipporneqarsimasut, kommunalbestyrelsip kommuni sinnerlugu imaluunniit Naalakkersuisut Namminersorlutik Oqartussat sinnerlugit ullut 30-t qaangiutsinnagit aningaasanit tamarmiusunit atorqeqsinnaasut killilissavaat, tassa ukiumi aningaasanut inatsiseqarfiusumi missingersuutit sipporneqarnissaannik naatsorsuutigisap annertoqataanik killilissavaat, taamaattorli imm. 5 takuuk.

Imm. 5. Kommunimut tunngatillugu kommunalbestyrelsi imaluunniit Namminersorlutik Oqartussanut tunngatillugu Naalakkersuisut ukiumi aningaasanut inatsiseqarfiusumi naatsorsuutigisatut sippuinerit sapinngisamik matussuserniarlugit allatut iliuuseqarnikkut atorqeqsinnaasunik killiliisoqannginnissaa pillugu aalajangiisinnaavoq imaluunniit atorqeqsinnaasut killilimmik killilerneqarnissaat pillugu aalajangiisinnaavoq."

§ 27-imut

16. § 27 imatut oqaasertalerneqassaaq:

”§ 27. Naalakkersuisoq taanna Naalakkersuisut Siulittaasuata aalajangersagai erseqqinnerusut malillugit tamatumunnga piginnaatinneqartoq § 25, imm. 1 aamma § 26, imm. 1-imi taaneqartut malillugit akulikinnerusumik aningaasartuutininik misissueqqusilluni aamma paasistussanik tunniusseqqusilluni kommunimut peqqusisinnaavoq, matumani kingullermik aningaasartuutininik nakkutilliinermi inernerit kommunimut ukiumoortumik naatsorsuutitigut kisitsisit inaarutaasut isertitassatut naatsorsuutaasunut 2,5 procent sinnerlugu amigartoorfiusinnaanerit takuneqarsinnaassappat.

Imm. 2. Naalakkersuisoq taanna Naalakkersuisut Siulittaasuata aalajangersagai erseqqinnerusut malillugit tamatumunnga piginnaatinneqartoq § 25, imm. 1 aamma § 26, imm. 1-imi taaneqartut malillugit akulikinnerusumik aningaasartuutunik nakkutilleeqqusilluni aamma paasissutissanik tunniusseqqusilluni peqqusisinnaavoq, matumani aningaasartuutunik nakkutilliinerni tulleriinni 2-ni inernerit kommunip isertitaasa 2,5 procent sinnerlugu inaarutaasumik kisitsisinik qaangiisinnaanerit takuneqarsinnaappat.

Imm. 3. Naalakkersuisoq taanna Naalakkersuisut Siulittaasuata aalajangersagai erseqqinnerusut malillugit tamatumunnga piginnaatinneqartoq, imm. 2-milu pisut malillugit pisariaqartinneqarpat, aningaasartuutunik misissueqqissaartoqarnissaanik kommunimut peqqusisinnaavoq."

§ 28-imut

17. § 28, imm. 1, ima oqaasertaqassaaq:

"§ 28. Kommunit tamarmik Naalakkersuisullu ukiumi aningaasanut inatsiseqarfiusumi nutaami kingusinnerpaamik qaammatit pingasut siulliit naaneranni misissussavaat ukiumi aningaasanut inatsiseqarfiusumi kingullermi aningaasartuutit pillugit naatsorsuutit kisitsisitaasa kommunip Namminersorlutilluunniit Oqartussat ukiumi aningaasanut inatsiseqarfiusumi kingullermi isertitaat sipporsimaneraat."

§ 29-imut

18. § 29 imatut oqaasertalerneqassaaq:

"§ 29. § 28, imm. 1 malillugu Naalakkersuisut aningaasartuutunik nakkutilliineranni paasinarsippat ukiuni aningaasanut inatsiseqarfiusuni kingullerni 4-ni naatsorsuutitut kisitsisit pigineqartut Namminersorlutik Oqartussat ingerlatsinerannut sanaartortitsinerannullu isertitanit 1 procent sinnerlugu amerliartorfiusunik amigartoorfiusut Naalakkersuisut Aningaasaqarnermut Akileraartarnermullu Ataatsimiititaliaata akuersissuteqareerneratigut ullut 30-t qaangiutsinnagit ukiumut aningaasanut inatsiseqarfiusumut nutaamut Namminersorlutik Oqartussat aningaasaliissutaanni aningaasat amerliartorfiusumik amigartoorfiusut ukiuni aningaasanut inatsiseqarfiusuni 4-ni kingullerni isertitat aqqutigalugit 1 procent sinnerlugu qaangerneqarsimappata minnerpaamik 33,33 procentiinik ikilisaassapput aningaasanillu atorneqartussanik assinganik aalajangiillutik, taamaattoq imm. 2 takuuk. Ukiuni aningaasanut inatsiseqarfiusuni 4-ni siuliini amerliartorfiusunik amigartoorutaasut sinneruttut ukiup aningaasanut inatsiseqarfiusup nutaap kingornagut ukiuni aningaasanut inatsiseqarfiusuni 3-ni Namminersorlutik Oqartussat aningaasaliissutaannik ikilisaassapput.

Imm. 2. Naalakkersuisut Aningaasaqarnermut Akileraartarnermullu Ataatsimiititaliap akuersissuteqareerneratigut, ukiunilu 4-ni aningaasanut inatsiseqarfiusuni siuliini ingerlatsineranut sanaartortitsinerannullu amerliartorfiusumik amigartoorutaasut iliuutsit allat aqqutigalugit akuerineqarsimappata, ukiumut aningaasanut inatsiseqarfiusumut nutaamut ukiunilu aningaasanut inatsiseqarfiusuni tulluuttuni Namminersorlutik Oqartussat

aningaasaliissutaannik ilanngaasoqarnissaanik imaluunniit taakkuninnga killilimmik ilanngaasoqarnissaanik aalajangiisinnaapput. Oqaaseqatigiinni siullerni pisut pineqartut pippata Naalackersuisut taamatutaaq atorneqarsinnaasunik killiliisinnaapput."

§ 30-imut

19. § 30, imm. 1 aamma 2, ima oqaasertalerneqassapput:

”§ 30. Naalackersuisoq taanna Naalackersuisut Siulittaasuata aalajangersagai erseqqinnerusunut malillugit tamatumunnga piginnaatinneqartoq kommunip ukiuni siuliini 4-ni naatsorsuutai isertitaniit 2,5 procent sinnerlugu amerliartorfiusumik amigartoorfiusut paasineqarpat ukiumi tapiissuteqarfiusumi Namminersorlutik Oqartussat kommuninut ataatsimoortumik tapiissutaanik ilanngaassaaq. Ukiuni aningaasanut inatsiseqarfiusuni pineqartuni isertitat 2,5 procent qaangerlugu amigartoorfiusimappata ukiumi aningaasanut inatsiseqarfiusumi siullermi aningaasat 40 procentiinik ilanngaasoqassaaq. Ukiuni aningaasanut inatsiseqarfiusuni pineqartuni isertitat 2,5 procent qaangerlugu amigartoorfiusimappata ukiuni aningaasanut inatsiseqarfiusuni tulliuttuni 3-ni aningaasat 20 procentiinik ilanngaasoqassaaq.

Imm. 2. Ukiumi aningaasanut inatsiseqarfiusumi siullermi ilanngaanernut ukiumi tapiissuteqarfiusumi qaammatini juulimi, aggustimi, septembarimi, oktobarimi, novembarimi aamma decembarimi assigiimmik ilanngaanermut akiliisoqassaaq. Ukiuni aningaasanut inatsiseqarfiusuni tulliuttuni ukiup ingerlanerani qaammatit 12-k assigiimmik ilanngaanermut akiliisoqassaaq.”

§ 31-imut

20. § 31, imm. 1, ima oqaasertaqassaaq:

“§ 31. Aningaasartuutunik Namminersorlutik Oqartussat kommunillu nakkutilliineranni inerniliussat pingaernerit pillugit Naalackersuisut kingusinnerpaamik 1. september aamma 1. december Inatsisartut Aningaasaqarnermut Akileraartarnermullu Ataatsimiititaliaanut kiisalu Kukkunersuineranut Ataatsimiititaliamut ilisimatitsisassapput, tamannalu pillugu paasissutissanik Namminersorlutik Oqartussat internetimi nittartagaatigut tamanut saqqummiussillutik. Ilisimatitsissut ilaatigut §§ 14-17-imi aningaasaliissutini taaneqartuni atuinermut tunngasunik immikkut killiffimmik imaqassaaq suliniutinullu nutaanut, neriorsuutinut il.il., suliniutinut aallarereersunut, neriorsuutinut il.il. aamma suliniutinut naammassisanut imaluunniit unitsiinnakkanut, neriorsuutinut il.il. agguataarlugit.”

§ 33-imut

21. § 33, imm. 2-mi nutaatut ilanngunneqassaaq:

"Imm. 2. Naalackersuisut kommunit Namminersorlutillu Oqartussat taarsigassarsianut allatullu akiitsunut pisussaaffinnut naatsorsuutaat pillugit malittarisassanik erseqqinnerusunik aalajangersaasinnaapput, soorlu pisussaaffinngoratarsinnaasunut, attartortitsinissamut

isumaqatigiissutit, pisortat namminersortullu suleqatigiinneri il.il. aamma tamakku pillugit aningaasaqarnermut naalakkersuisoqarfimmut nalunaaruteqartarnerit. Naalakkersuisut tassunga atatillugu naalakkersuisup taassuma Naalakkersuisut Siulittaasuata aalajangersagai erseqqinnerusut malillugit tamatumunnga piginnaatinneqartup nakkutilliinissamut atugassanik paasissutissanik kommuninut piniarsinnaaneranik aalajangersaasinnaapput.”

§ 34-imut

22. § 34 imm. 1, ima oqaasertaqassaaq:

”§ 34. Namminersorlutik Oqartussat naatsorsuuserinermut pisortaat aallartitaq Naalakkersuisunit toqqarneqartoq aamma aallartitat kommuninut toqqarneqartut peqatigalugit Missingersuusiornermut Naatsorsuuserinermullu Siunnersuisoqatigiinni ilaasortaavoq. Siunnersuisoqatigiit missingersuutinut naatsorsuutinullu tunngasuni pisortat ataatsimut soqutigisaannut tunngatillugu apeqqutini Naalakkersuisunut siunnersuisassapput.”

§ 40-imut

23. § 40 imatut oqaasertalerneqassaaq:

”§ 40. Naalakkersuisut paasissutissanik sugaluartunik naatsorsuutit naliliiffiginissaannut pisariaqartinneqartunik kukkunersiuisunut nalunaaruteqassapput, takuuk Inatsisartut Naalakkersuisullu pillugit Inatsisartut inatsisaanni § 18 aamma § 19.”

§ 46-imut

24. § 46, imm. 3, ima oqaasertalerneqassaaq:

”Imm. 3. Aningaasaqarnermut Siunnersuisoqatigiit allattoqarnerat aningaasaqarnermut naalakkersuisoqarfimmit isumagineqarpoq.”

Kapitalip qulequtassaanut

25. Kapitali 8-ip qulequtaa ima oqaasertalerneqassaaq:

"Pineqaatissiissutaasinnaasut"

§ 47-imut

26. § 47 imatut oqaasertalerneqassaaq:

”§ 47. Inatsit manna malillugu pisussaaffigisanik kommunalbestyrelsi isumaginikkusunngippat Nakkutilliisoqarfik kommunalbestyrelsimi ilaasortanut pisussaaffimmik isumaginikkusunngitsunut pinngitsaaliissummik akileeqqusilluni peqqusisinnaavoq.

Imm. 2. Kommunalbestyrelsimut ilaasortaq kommunalbestyrelsimi ilaasortatut pisussaaffimminik sakkortuumik unioqqutitsisoq akiliisinneqartussanngortinneqarsinnaavoq.

Imm. 3. Assuarliut imm. 2 naapertorlugu pisoq taamaallaat Nakkutilliisoqarfiup piumasaqarneratigut pisinnaavoq."

Kapitali nutaaq

27. § 47-p kingornagut kapitalimut qulequtsiussatut nutaatut ilanngunneqassaaq:

”Kapitali 01

Atuutilersinneqarnera ikaarsaariarnermilu aalajangersakkat".

Paragraffit nutaat

28. § 47-p kingorna kapitali 01-imi ilanngunneqassaaq:

”§ 01. Inatsisartut inatsisaat 1. januar 2018 atuutilissaaq, taamaattoq takuuk imm. 2-4.

Imm. 2. §§ 14 aamma 17-ip atuutilerfissaannut piffissaq nalunaarut aqqutigalugu Naalakkersuisunit aalajangersarneqassaaq.

Imm. 3. § 18 1. december 2016 atuutilissaaq.

Imm. 4. § 26, imm. 3-5, aamma §§ 27-30 ulloq 1. januar 2019 atuutilissapput.

Imm. 5. Ulloq 31. december 2017 Namminersornerullutik Oqartussat naatsorsuuseriveqarnerat il.il. pillugit Inatsisartut inatsisaat nr. 23, 3. november 1994-imeersoq, Namminersornerullutik Oqartussat missingersuutaat pillugit Inatsisartut inatsisaat nr. 8, 29. oktober 1999-imeersoq, Namminersornerullutik Oqartussat missingersuutaat pillugit Inatsisartut inatsisaata nr. 6, 29. oktober 1999-imeersup allanngortinneqarneranik Inatsisartut inatsisaat nr. 1, 23. maj 2000-imeersoq aamma Kommunit aqunneqarnerat pillugu Inatsisartut inatsisaat nr. 22, 18. november 2010-meersoq atorunnaassapput.

Imm. 6. Inatsisitigut aalajangersakkat imm. 4-mi inatsisit aalajangersakkallu taaneqartut malillugit atortussanngortinneqarsimasut atuutiinnassapput inatsisitigut aalajangersakkanik Inatsisartut inatsisaat manna malillugu atortussanngortinneqartunik taarserneqarnissaat tikillugu.

§ 02. Sanaartugassanut Iluarsagassanullu Aningaasaateqarfik, takuuk Namminersorlutik Oqartussat missingersuutaat pillugit Inatsisartut inatsisaanni §§ 21-24, §§ 14-17-ip atuutilernerisa kingornagut ukiut tallimassaanni 31. december atorunnaassaaq.

Imm. 2 Naalakkersuisut Sanaartornermik Iluarsartuussisarnermillu aningaasaateqarfiup atorunnaarsinnissaanut malittarisassanik erseqqinnerusunik aalajangersaasinnaapput, tassunga ilanngullugu aningaasaateqarfiup ataani sulianik atorunnaarsitsinernut atatillugu ikaarsaarnermi aaqqissuussinernik aningaasaateqarfiullu aningaasaataanik nuussinernik aalajangersaanerit.”

Nalinginnaasumik nassuiaatit

Inatsisissatut siunnersuummi saqqummiunneqartumi unammisassat arlallit qaangerniarnissaat allannguutissatut siunnersuummi siunertarineqarpoq.

Piginnaatitsissutinik agguataarineq

Inatsisissatut siunnersuummi saqqummiunneqartumi Naalakkersuisut ilaasortaasa ataasiakkaat namminneq oqartussaaffimmik iluini arlalitsigut namminneerlutik annerujussuarmik oqartussaaffeqalernissaat aallaavigineqarpoq.

Inatsisissatut siunnersuutip saqqummiunneqarnerata kingornagut arlalinniit uparuarneqarpoq tamanna namminersorlutik oqartussani piginnaatitsissutinik agguasarnermi tunngavinnik pingaarutilinnik atorunnaarsitsinerusoq. Taamatuttaaq uparuarneqarpoq Inatsisartut Naalakkersuisullu akornanni piginnaatitsissutinik agguasarnernik atuuttunik arlalitsigut inatsisissatut siunnersuut atorunnaarsitsinerusoq.

Allannguutissatut siunnersuut aqqutigalugu Inatsisartut inatsisaat Naalakkersuisunut ilaasortat akornanni piginnaatitsissutinik agguasarnernut nalinginnaasumik atuuttunut naapertuunnerulissaaq, soorluttaarlu Inatsisartut Naalakkersuisullu akornanni piginnaatitsissutinik agguasarneq atuuttoq atuinneqassalluni.

Taarsigassarsineq

Pisortat inissianut, inuussutissarsiutinut attaveqaatitigulluunniit suliniutaannut aningaasaliissutinut taarsigassarsineri sukannersumik aqunneqassasut, inatsisissatut siunnersuummi takuneqarsinnaavoq. Pisortat namminersortullu peqatigiinnerat (OPP-suliniutit) manna tikillugu killeqangaatsiartumik Kalaallit Nunaanni atorneqarpoq, suliassanullu annerusunut, soorlu mittarfiliortitsinernut atatillugu pisinnaalluni. Sanaartornerit ingerlatsinerillu namminersorluni aningaasaliisunut ataavartumik pisortanit suliffeqarfinnillu il.il., inatsisip § 1-a naapertorlugu ilaatinneqartunit akilersugassanngorlugit ingerlatassanngortitsinerni, OPP-mik suliniutit aningaasalersornerat taarsigassarsinertulli isigineqassaaq. OPP-mik suliniutit pisortatut oqartussaasunit aningaasaleeriaatsit allat assigalugit minnerpaamik pisussaaffiliisuupput, taamaammallu taakku akiitsuninnermut il.il. sanillersuunneqartariaqarlutik.

Sanaartugassat iluarsagassallu il.il.

Sanaartugassanut Iluarsagassanullu Aningaasaateqarfik aqqissuussinermik nutaamik taarserneqassasoq siunnersuutigineqarpoq, taamaaliornermilu aningaasanut inatsimmi namminersorlutik oqartussat sanaartugassaasa iluarsagassaasalu pilersaarusiorderannut, sanaartugassanik iluarsagassanillu suliarinninnernut, illuutitut aalaakkaasunut, sanaartornernut allanullu sulianut aningaasaliinernut, sanaartugassanut iluarsagassanullu tunngatillugu taarsigassarsititsinissamik neriorsuutinut kiisalu sanaartugassanut

iluarsagassanullu tapiissutitut aningaasaliissutit siunissami immikkoortinneqassallutik. Siunnersuuteqarnermi sanaartugassanut iluarsagassanullu tunngasuni pingaartumik suliassat annertuut ukiut aningaasanut inatsiseqarfiusut arlallit atorlugit ingerlanneqartarnerat eqqarsaatigineqarsimavoq.

Sanaartugassanut Iluarsagassanullu Aningaasaateqarfik arlalinnit isornartorsiorneqartarsimavoq. Isornartorsiuineri pingaarnermik aningaasaateqarfimmi pissutsit tunngasut paasiuminaatsuuneri pineqarsimapput. Namminersorlutik Oqartussat sanaartugassanut iluarsagassanullu aningaasaliissutaa kiisalu illuutitut aalaakkaasunut sanaartortitsinernullu aningaasaliisarnersa suli paasiuminarnerulernissaat siunnersuummi siunertarineqarpoq. Paasiuminarnerusoqalernissaa aningaasartuutit akuttunngitsumik nakkutilliisarnermut inerniliunneqartuunillu pingaarnernik tamanut saqqummiisarnernut nutaanik piumasqaateqalernikkut aamma anguniarneqarpoq, takuuk inatsisissatut siunnersuummi § 25, imm. 1 aamma § 31, imm. 1. Annerusumik paasiuminarnerulersitsineq aamma sanaartortitsinernut iluarsagassanullu tunngasunut aningaasaliissutit atuisarnermut oqallittoqarnissaanut iluaqutaasussaassaaq.

Aaqqissuussineq nutaaq marloqiusamik aningaasaliinissamut tunngavinnik tunngaveqarpoq. Tunngavissap kukkunerisuisoqarfimmiit Deloitte-mit aamma isumasioqatigiinnermi ilaatigut GE-mit tapersorneqarluni siunnersuutigineqartup kingunerissavaa sanaartortitsinissanut iluarsagassanilu suliassanut aallaqqaammut aningaasaliissutissanik nalunaaruteqartoqartassamat. Pilersarusiorneq naammassigaangat, entreprenørimiillu neqeroorutivik pigineqaleriarpat ilumut suliassap sularinissaanut aningaasaliissutit tunniussisoqassanersoq aalajangerneqartassaaq. Tunngavissaq imaalillugu assersuusiorneqarsinnaavoq:

Immikkoort unut Pilersaarutit	AIS 2019 Pilersaarutitut aningaasaliissutit	AIS 2020 Pilersaarutitut aningaasaliissutit	AIS 2020 Sanaartorneqartuni k aallartitsinermut aningaasaliissutit	AIS 2021 Sanaartorneqartuni k aallartitsinermut aningaasaliissutit
Pilersaarut 1	0	15 mio. kr.	30 mio. kr.	30 mio. kr.
Pilersaarut 2	5 mio. kr.	0	50 mio. kr.	25 mio. kr.
Pilersaarut 3	3 mio. kr.	1	0	10 mio. kr.
Pilersaarut 4	0	0	0	0

Takussutissami immikkoortunut pilersaarutit naalackersuisoqarfiit sularisaat tunngavigalugit Naalackersuisut pingaarnersuisarnissaat takutinneqarpoq aammalu sanaartugassanut iluarsagassanullu sorlernut AIS aqqutigalugu pilersaarutitut aningaasaliissutit

immikkoortitsisoqassanersoq pingaarnersiuisoqarluni, tamannalu pillugu aningaasanut inatsisissatut siunnersuummut siunnersuummik ilanngussaqaarluni. Pilersaarutinut aningaasaliissutini ilaapput suliaasat tamarmik immikkoortunut pilersaarutip pigineqalerneraniit suliarineqartussat, entreprenørimiillu neqeroorutivimmik pigisaqartoqalernissaa tikillugu (missingersuutit A-t).

Aningaasanut inatsisissatut siunnersuummuttaaq sanaartortitsinissat iluarsagassallu suliarinissaannut ataatsimut aningaasaliissutinik ilanngussisoqassaaq. Aningaasaliissutit entreprenøriniit neqeroorutaasunut Aningaasaqarnermut Akileraartarnermullu Ataatsimiititaliap isummernissaanut aallaaviussapput. Aningaasaqarnermut Akileraartarnermullu Ataatsimiititaliami suliarinninnissaaq ilassutitut aningaasaliissutissanut qinnuteqaat tunngavigalugu pissaaq. Siunnersuuteqarnermut atatillugu AP95-imi piffissaliussani atuuttuni allannguisoqarnissaa naatsorsuutaanngilaq.

Suliaq ukiut aningaasanut inatsiseqarfiusut arlallit atorlugit suliarineqarpat suliaasap aallartinneqarnissaanut aalajangiisoqarnerani aningaasat pilersaarusiornissamut sanasoqarnissaanullu atorneqarsinnaasut ukiuni missingersuusiorfiusuni assinganik ilanngaaffigineqartariaqassapput.

Aaqqissuussineq nutaaq aqutigalugu Inatsisartut sanaartortitsinissanut iluarsagassanullu sulianut aningaasaliissutit ilanissaannut ilanngarnissaannulluunniit periarfissaat killilerneqartussaanngillat. Akerlianik sanaartortitsinernut aningaasanik atuisoqarneranut, sanaartugassanut immikkoortunut pilersaarutit suliarinerannut aamma sanaartortitsinissanut aningaasat atortussanngortinneranni Aningaasaqarnermut Akileraartarnermullu Ataatsimiititaliap qitiusumik inissisimaneranut paasiuminarnerusumik ingerlatsisoqarnera aningaasanut inatsimmi sanaartugassanut aningaasaliinerit pillugit naalackersuinikkut pingaarnertigut oqallittoqarnissaanut ajunnginnerusumik tunngavissaqalernissaaq ilimagineqarpoq.

Aaqqissuussinerup eqaatsup qulakkeernissaa siunertaralugu, pisariaqarpallu aningaasanut inatsimmi oqaasertaliussat aqutigalugit aningaasanut killiliussat aalajangersarneqartut iluanni, pilersaarutinut aningaasaliissutissat imaluunniit sanaartornerup aallartinnissaanut aningaasaliissutissat nalunaarutigeqqaarnagit sanaartugassanut iluarsagassanullu tigussaasunut aallartitsisoqarnissaanik Naalackersuisut piginnaatinnissaat ilimagineqarpoq.

Sanaartortitsinerit iluarsagassanillu suliat annerit amerlanerpaartaat ukioq aningaasanut inatsiseqarfiusoq ataaseq sinnerlugu suliarineqartarput. Taamaammat ukiumi aningaasanut inatsiseqarfiusumi suliamut aalajangersimasumut atuinikinneruneq suliamut pineqartumut tunngatillugu kinguaattoortoqarneranik pissuteqarsimappat sanaartortitsinermut iluarsagassanullu aningaasaliissutit nuunneqarnissaannut Naalackersuisut malittarisassanik aalajangersaasinnaanissaat eqqarsaataavoq.

Suliaq tamakkerlugu sulialluunniit ilaannaata siuartinnera suliassap suliarinissaanut aningaasartuutit assinganik siuartinneqarsinnaanerani kinguneqassaaq. Taamatut siuartsinerit Aningaasaqarnermut Akileraartarnermullu Ataatsimiititaliamut ilassutitut aningaasaliissutitut saqqummiunneqartariaqassapput, ukiunilu tulliuttuni aningaasaliissutit assinganik ikilisinneqarnissaannik kinguneqartussaalluni.

Taamatuttaaq ukiup aningaasanut inatsiseqarfiusup ingerlanerani suliassat tuaviuussassat ilimaginngisat takkuteriataarsinnaapput, soorlu oqoqarnermik, anorersuup aserugaanik assigisaannilluunniit paasisaqartoqartillugu. Taamatut pisoqarsimappat Aningaasaqarnermut Akileraartarnermullu Ataatsimiititaliamut ilassutitut aningaasaliissutit pillugit qinnuteqaammik saqqummiisoqartariaqarpoq.

Aaqqissuussineq nutaaq atuutilerpat Sanaartugassanut Iluarsagassanullu Aningaasaateqarfimmut aningaasanik tunniussisarneq unissaaq. Aningaasaateqarfilli suliarineqartut aaqqissuussinerup nutaap atuutilernissaa tikillugu aallartinneqartut naammassinissaat siunertaralugu ukiuni 5-ni ikaarsaariarfiusumi ingerlatiinnarneqassaaq.

Aaqqissuussinerup nutaap Sanaartugassanut Iluarsagassanullu Aningaasaateqarfimmiit ugguuna aallaanerussutigaa Naalackersuisut Inatsisartullu aallaqqaammut aallaaviatigut pilersaarummut aningaasaliissutissanik immikkoortitsisoqassanersoq "taamaallaat" isummerfigisussaammassuk. Pilersaarummik naammasseriikkamik akeqartinneqareertumillu aallartitsisoqarsimappat oqartussaaffik aningaasaliisussaaq isummertussaassaaq pilersaarut ilumut aallartinneqassanersoq. Taamaalillunilu aningaasanik amerliartortitsisoqariaannaanera pinngitsoortinneqarsinnaavoq, tassanilu ilaatigut pilersaarusiormut aningaasaliissutit sanaartorerillu aallartinnerannut aningaasaliissutit immikkut isummorsorfigineqartalissammata pissutaavoq.

Aaqqissuussinermi nutaami aningaasaleeqqittoqarneq ajorpoq.

Aningaasaleeqqittarnerup kingunerisarpaa sanaartortitsinissanut ataasiakkaanut tunngaviatigut ukiut tamaasa naliliisoqartarnera (sanaartornernut aallartereersunut aningaasaliissutit, taarsigassarsititsinissamut neriorsuinerit il.il.). Taamaakkaluartoq sanaartortitsinissanut iluarsagassanullu amerlanerpaanut tunngatillugu naliliisoqarsinnaanaviangilaq suliassat aallartinneqareersimappata. Politikikkut sulinermut suliassanik allanik ulikkaarfioersumut aningaasaleeqqittoqartarniarpat sanaartortitsinerit aallartinnerannut arlalitsigut aningaasaliisarnerit arlallit ingerlateqqinnissaat pillugit aalajangiisoqartariaqalissaaq, matumanilu sanaartortitsinerup siuarfioerenera pissutaalluni aningaasaliissutigineqartut pisariaarutereersimangikkunik allanngortinneqarsinnaajunnaarsimassammata.

Aningaasaleeqqittoqartarneratalu kingunerisinnaavaa naalackersuinikkut tullerriarinerit suliassanik aallartinneqareersunik unitsitsinissamik kinguneqarsinnaanerani, tamannalu nukissanik tamakkiisuunngitsumik atuinissamik, sanaartortitsinerni nalornisoqalernerani

kiisalu taarseeqqusinernik kinguneqarsinnaalluni. Aaqqissuussineq siunnersuutigineqartoq nutaaq atoraanni tamanna qaangerneqarsinnaavoq.

Kalaallit Nunaanni Sulisitsisut Peqatigiiffiata ataatsimiittoqarnerani oqaatigisimavaat aningaasaleeqqittarneq Namminersorlutik Oqartussat sanaartugassaasa iluarsagassaasalu pitsaanerusementik naammassineqartarnissaannut iluaqutaanavianngitsoq. Peqatigitilluguli peqatigiiffimmiit uparuarneqarpoq marloqiusamik aningaasaleeriaaseq Naalakkersuisut aqutsisoqarfianni sanaartortitsinerneq allaffissornikkut sulisussat amigaataanerannut iluaqutaanavianngitsoq, periuserineqartullu siunertarineqartoq malillugu ingerlassappata sulisussat taamaattut piniarnissaat pingaaruteqarmat.

Sanaartornermut Iluarsartuussisarnermullu Aningaasaateqarfimmut isornartorsiuisarnermi aningaasaateqarfiup suliai pillugit kingusissukkat nassuiaasiortarnerit, nassuiaasiortannginnerilluunniit isornartorsiutaasarput. Tamannalu annertuumik aningaasaateqarfimmi pissutsinik takunnikkuminnaatsitsisarnermut qanorlu inneranik paasiuminaatsitsinerneq kinguneqartarpoq. Kingusissukkat nassuiaasiortarnermut, nassuiaasiunngittarnermullu patsisaasut arlaqarput, minnerunngitsumillu aningaasaqarnermut nalunaarsukkani suliniutinillu aqutsinerneq nalunaarsukkani ataqatigiinngitsoqartarnera pissutsinik unammillernartunik arlalinnik kinguneqartarpoq. Naalakkersuisullu pineqartumi pitsaanerusementik ataavartumillu oqimaaqatigiisitsisarneq qulakkeerniarlugu, aaqqissuussaannikkut allanngortitsinerit pisariaqartut isumagissallugit naatsorsuutigaat. Taamaalillutillu Naalakkersuisut aamma ukiumoortumik Inatsisartunut nunatta karsiata naatsorsuutaanik saqqummiussineq peqatigalugu sanaartukkanut il.il. aningaasaliissutit pillugit nassuiaammik saqqummiussisarnerissamut piumasaaqammik naammassinninnissaq siunniuppaat.

Ataatsimoortumik tapiissutit

Suliassat amerlanerit kommuninut nuunneqarneri ilutigalugu ataatsimoortumik tapiissutit pillugit isumaqatigiissutit ilusaat allanngortussaapput. Ilaatigut ataatsimoortumik tapiissutit ilaat annertusiartuinnartut suliassat aalajangersimasut sularinissaannut imaluunniit siunertanut aalajangersimasunut atorineqarnissaat ilimanarpoq. Tamannalu anguniarlugu Inatsisartut inatsisaanni ilanngunneqartussat siunnersuutigineqarpoq kommunit ukiumoortumik missingersuusiortarnerminni suliassanut taakkununga pinngitsooratik aningaasanik amerlaqataanik immikkoortitsisassasut.

Kinguneratigut aningaasartuutunik nakkutiginninneq

Inatsisissatut siunnersuummi nassiunneqartumi ukiuni aningaasanut inatsiseqarfiusuni ataasiakkaani amigartoorutaasunik ukiumi aningaasanut inatsiseqarfiusumi tullermi nalimmassaasoqarnissaa anguniarneqarpoq. Taamatut aaqqissuussineq ilaatigut killeqartitsisussaavoq, ilaatigullu inatsisissatut siunnersuummi § 2-mi aallaavigineqartumut akerliussusaalluni, tassanimi aningaasaqarnerup ukiut 4-t qaangiunnerisigut oqimaaqatigiinnissaa naliliiffigineqartartussaammat.

Taamaamat siunnersuutigineqarpoq kinguneratigut aningaasartuutunik nakkutiginnittarneq ukiut 4-kkaarlugit ingerlanneqartassasoq.

Pineqaatissiissutaasinnaasut

Kommunit aqunneqarnerat pillugu Inatsisartut inatsisaanni malittarisassat malillugit kommunalbestyrelsimi ilaasortat arlaatigut pisoqarsimatillugu pinngitsaaliissummik akiliisinneqanngikkunik allatigut akiliisinneqarsinnaapput. Inatsisissasut siunnersuummi matumani pissutsit tamakku allanngortinnissaat siunertarineqanngilaq. Taamaamat Nakkutilliisoqarfik siunnersuisoqatigiit assigalugit piginnaatitsiissummik tunineqassasoq siunnersuutigineqarpoq, matumani kommunit aningaasaqarnermik aqutsinerat pillugu malittarisassat ilaasa Kommunit aamma Namminersorlutik Oqartussat missingersuutaat naatsorsuutaallu pillugit Inatsisartut Inatsisaannut nutaamut nuunneqaraluarpataluunniit.

Allannguutit allat

Pingaarnermik teknikimut allaffissornikkullu tunngasutigut allanik allannguisoqarnissaa aamma siunnersuutigineqarpoq, soorluttaarlu kinguneqartitsiffiusunik arlalitsigut allannguisoqarnissaa siunnersuutigineqarluni.

Tusarniaaneq

Piffissami 16. - 30. september 2016 allannguutissatut siunnersuut Sulisitsisunut, NUSUKA-mut, SIK-mut, Aatsitassaqarnermut Naalackersuisoqarfimmu, Nunanut allanut pisortaqaqarfimmu, Ineqarnermut, Sanaartornermut Attaveqarnermullu Naalackersuisoqarfimmu, Aalisarnermut, Piniarnermut Nunalerinermullu Naalackersuisoqarfimmu, Inuussutissarsiornermut, Suliffeqarnermut Niuernermullu Naalackersuisoqarfimmu, Peqqinnissamut Naalackersuisoqarfimmu, Ilaqutariinnermut, Naligiisitaanermut, Isumaginninnermut tunngasunut Inatsiseqarnermullu Naalackersuisoqarfimmu, Ilinniartitaanermut, Kulturimut, Ilisimatusarnermut Ilageeqarnermullu Naalackersuisoqarfimmu, Pinngortitamut, Avatangiisinut Nukissiuuteqarnermullu Naalackersuisoqarfimmu, Naalackersuisut Siulittaasuata Naalackersuisoqarfianut kiisalu Qeqqata Kommunianut, Kommune Kujallermut, Kommuneqarfik Sermersuumut Qaasuitsullu Kommunianut piffissami 16. septemberimit 14. oktober 2016-imut tusarniaassutigineqarpoq.

SIK-mit, Sulisitsisunit, KANUKA-mit, Kommuneqarfik Sermersuumit Kommune Kujallermillu tusarniaanermut akissutit tiguneqarput.

Ataani tusarniaanermi akissutini pingaarnerit nalinginnaasumik aallatatut ilanngunneqarput, Naalackersuisullu taakkununga oqaaseqaataat *equngasunik* allanneqarput.

SIK-p allannguutissatut siunnersuutit taperserpai, taakkumi kommunit namminersorlutillu oqartussat missingersuutaasa naatsorsuutaasalu pitsaasumik naapertuuttumillu aqunneqarnerannut ikorfartuutit isigineqarput.

KANUKOKA-p inatsisissatut siunnersuutaqaartumut akissutini nassiuteqqippaa.

Sulisitsisut aallaavittut sanaartugassanut iluarsartuussassanullu tunngasuni aningaasaleeriaatsip marloqiusannngortinnera tunngaviusumik iluarisimaarpaa. Ingammillu ukiunut arlalinnut atuuttussanik aningaasaliisarnermik suliaqartalernissaq Sulisitsisut nuannaarutigaa. Suliniummut aalajangersimasumut ukiuni arlalinni atorneqartussat aningaasaliissutaasut Inatsisartunit atorneqarsinnaanerit inatsisitigut toqqammavissaqaanginnera Sulisitsisut tunngavissaatippaat.

Aallaavittut siusinnerusukkut aningaasaliissutitut aalajangiussat Inatsisartut aalajangiusimassagaat naatsorsuutigineqarpoq. Inatsisissatulli siunnersuutit Inatsisartut inatsisiliortutut aningaasaliinermullu oqartussaassuseqartutut siusinnerusukkut aalajangikkaminik allannngortitsisinnaanerit killilinngilaa. Taamatullu allannguinerit pisut ilaanni, allannngortitsinerup kingunerisaanik annaasaqartunut taarsiissuteqarsinnaaneq, allatulluunniit aaqqiissuteqarsinnaaneq nassatarisinnaasassavaat.

Oqaaseq "...sinnaavoq" oqaaseqatigiinni "Suliaq tamakkerlugu sulialluunniit ilaannaata siuartinnera suliaasap suliarinissaanut aningaasartuutit assinganik siuartinneqarsinnaanerit kinguneqarsinnaavoq, kinguneqassaaq-mik taarserneqartariaqarpoq.

"...sinnaavoq" "...saaq"-mik taarserneqarpoq.

Ingerlaavartumik ukiut sisamat sinnerlugit siviisutigisumi amigartooruteqartoqarpat, aningaasartuutit aqutsineq qanoq isumagineqassanersoq Sulisitsisut apeqqutigaa.

Tamanna allannguutissatut siunnersuummi nr. 18-imi Naalakkersuisut Aningaasaqarnermut Akileraartarnermullu Ataatsimiititaliaata akuersissuteqareerneratigut ullut 30-t qaangiutsinnagit ukiumut aningaasanut inatsiseqarfiusumut nutaamut Namminersorlutik Oqartussat aningaasaliissutaanni aningaasat amerliartorfiusumik amigartooruteqarfiusut ukiuni aningaasanut inatsiseqarfiusuni 4-ni kingullerni isertitat aqutugalugit 1 procent sinnerlugu qaangerneqarsimappata minnerpaamik 33,33 procentiinik ikilisaassapput aningaasanillu atorneqartussanik assinganik aalajangiillutik. Ukiuni aningaasanut inatsiseqarfiusuni 4-ni siuliini amerliartorfiusunik amigartoorutaasut sinneruttut ukiup aningaasanut inatsiseqarfiusup nutaap kingornagut ukiuni aningaasanut inatsiseqarfiusuni 3-ni Namminersorlutik Oqartussat aningaasaliissutaannik ikilisaassapput.

Taamattaq § 3, imm. 1-imi "immikkorluinnaq pisoqartillugu" qanoq paasineqassanersoq apeqqutigineqarpoq.

*Inatsisissatut siunnersuutip nassuiaataani § 3, imm. 1-imut tunngasumik allanneqarpoq”
”Immikkorluinnaq pisoqartillugu” paasineqassaaq Namminersorlutik Oqartussat
aqussinnaangisaanik pisoqarneratut, pisortallu ataatsimut aningaasaataannut annertuumik
kinguneqartumik, imaluunniit piffissani aalajangersimasuni aningaasarsiornikkut
annertuumik appariaateqarnermik pisoqarneratut. Aalajangersagaq taamaallaat
immikkorluinnaq ittumik kalaallit aningaasaqarneranik annertuumik kinguararfiusumik
pisoqarnerani atugassatut eqqarsaataavoq. Immikkorluinnaq ittumik pisoqarneratut
nunarsuarmi aningaasaqarnikkut patajaanngitsumik inissisimalernej, Kalaallit Nunaata
aalisagaataani peqassutsikkut isasoorneq, qanittumi sorsuunnerit assigisaasalu pinerat
taaneqarsinnaapput. Piffissaq akunnattumi matumani piffissaq ukiunit tallimanit qulinut
sivisussuseqartoq pineqarpoq.”*

§ 12-imut nassuiaammi "immikkorluinnaq pisoqarnerani" qanoq paasineqassanersoq allassimassaaq.

Siunnersuut ilanngunneqarpoq, takuuk allannguutissatut siunnersuummi nr. 4-mut nassuiaatit.

§ 26, imm. 2 naapertorlugu uninngatitsinerit kommunit nalunaaruteqarnissaannik pinngitsaaliissutittut atorneqassanersut imaluunniit uninngatitsinerit kommuninut piumasaqaataasinnaasunut qularnaaveqqutaassanersut Sulisitsisut paaserusuppaat.

Aalajangersakkami oqaaseqatigiinni kingullerni ataatsimoortumik tapiissutit uninngatitat, nalunaaruteqarnerup pinerani tunniunneqartassasut takuneqarsinnaavoq.

Kommuneqarfik Sermersuup (KS) ulloq 23. februar 2016-imi inatsisissatut siunnersuummut tusarniaanermut akissuteqarnerminni, ingammik siuariartorneq innuttaasut katitigaanerisa ineriartornerat eqqummaariffigalugu pisassasoq aalajangiusimavaa.

Uani inatsisissatut siunnersuummut nalinginnaasumik nassuiaatini immikkoortoq 8-mi oqaatigineqartut Naalakkersuisut innersuussutigaat.

KS-ip paasinninnera naapertorlugu § 21, imm. 2-mi nittartakkakkut quppernermi missingersuutitut siunnersuutip siullermeenera aappassaaneernaluunniit tamanut takusassiarineqassanersoq erseqqissarneqartariaqarpoq.

Siunnersuutigineqartoq ilanngunneqarpoq.

§ 26, imm. 4-mi namminersornerullutik oqartussat kommunillu ataatsimoortillugit immikkoortillugilluunniit pineqarnerseq ersernerluppoq. Erseqqissaavigineqartariaqarpoq.

Aalajangersakkani taakku tamarmik immikkoortillugit pineqartut aalajangersakkami nassuiaatinilu erseqqissumik allassimasorineqarpoq.

§ 26, imm. 4-mi "anigaasanit tamarmiusunit atorreqarsinnaasut killilissavaat"-mi suna peqarnerseq erseqqinngilaq. Tamanna oqartussani ataasiakkaani sipaaruteqartoqartariaqarninngorlugu allangortinneqartariaqarpoq, tassunga ilanngullugit ukiup sinneranut anigaasanik atorreqarsinnaasunik killiliinerit, minnerpaamik sippuissutissatut naatsorsuutigineqartut annertoqqataannik.

Atorreqarsinnaasunik killiliineq anigaasaliissutinik appartitsinerup assingaa, taamaalillunilu oqartussap pineqartup anigaasartuutaanik appaanerulluni. Sipaarutit atorreqarsinnaasunillu killiliinerit imarisamikku assigiinngissuteqarsorinangillat.

KS-ip isumaa naapertorlugu § 33, imm. 2-mi attartortitsinermik oqaatsip anigaasanik attartortitsinermut taamaallaat tunngasunngortinnissaa, taamaalillunilu atortunik attartornermut tunngannginnera erseqqissarneqartariaqarpoq.

Aalajangersakkami aamma atortut attartukkat pineqarput, piffissamummi sivisuunik atuuttunik attartornerit kommunip siunissami anigaasatigut iliuuserisinnaasaanut annertuumik sunniuteqarsinnaasarput.

§ 47-mi kommunalbestyrelsimi ilaasortat inatsisitigut illersugaanerat eqqarsaatigalugu, iliuutsit suut pineqaatissiisinaanermik kinguneqarsinnaanerat erseqqissarneqartariaqartoq KS isumaqarpoq.

Suliniutit pineqaatissiisinaanermut kinguneqartut kommunit aqunneqarnerat pillug Inatsisartut inatsisaat naapertorlugu pineqaatissiisinnaasut assigissavaat. Kommuninut nakkutilliisoqarfik kommunit aqunneqarnerat pillugu Inatsisartut inatsisaanni malittarisassat naapertorlugit assingusumik taamatullu annertussuseqartumik kommunalbestyrelsimi ilaasortanut pinngitsaaliissutinik akiligassanngortitsisinnaallutillu, kommunalbestyrelsimi ilaasortat iliuuseqanngitsoorneranni kommunilluunniit anigaasatigut ingerlanneqarneranut atatillugu pisussaaffimminnik sumiginnaaneranni akiliisussanngortitaaneq piunasaqaatigisinnaavaat.

Allanguutissatut siunnersuut Kommune Kujallip (KJ) 27. januar 2016-imi tusarniaanermut akissutimini annertuumik eqqarsarnartoqartitsineranut naammaginatsumik naaperiaanerunngitsoq kommuni isumaqarpoq.

Inatsisissatut siunnersuut allannguutissatut siunnersuut peqatigalugu kommunini namminersorlutillu oqartussani pitsaanerusumik aningaasaqarnikkut aqutsinermut pitsaasumik pisariaqartumillu toqqammavissiillunilu, ataatsimut isigalugu pisortat aningaasaqarnerannik patajaannerulersitsissasoq Naalakkersuisut naliliipput.

KJ erseqqissaateqarpoq:

- Inatsisissatut siunnersuutit kommuninut missingersuutinut naatsorsuutinullu piumasaqaatinik malinninngitsunik, ataatsimoortumik tapiissutigut pineqaatissiinermik siunertaqartut, tapiissutit politikikkut isumaqatigiissutinik toqqammaveqarnerannut ataqatigiissikkuminaatsut.
- Naalakkersuisut aningaasanut inatsisip imarisaanik ikkussuineramik allanngortitsinermillu pisinnaassusaasa annertusineqarnerat, kommunit aningaasaqarnikkut pilersaarusiorsinnaanerat ajornakusuulersissavaa.
- Kommunit aningaasaqarnermut paasissutissanik nalunaaruteqartarnissamik pisussaaffiisa annertunerulersinneqarnerannut naapertuuttumik siunertaq takujuminnaatsinneqartoq.

Kommunit pisortat aningaasaqarnerannut attuumassutaasa annertusiartornera ingiaqatigalugu, kommunit aningaasartuutinut kissaataat nunamilu tamarmi aningaasaqarnermik attanneqarsinnaasumik anguniagaqarneq naapertuuttumillu aningaasaqarnikkut aqutsinerup malitsinneqarnissaasa ataqatigiissuunissaannik qulakkeerinissamik pisariaqartitsineq anertusiartorpoq. Napatitsinermut siuariartornissamullu pilersaarummi erseqqissumik takutinneqartutut, pisortat ingerlataanni tamani sukannernerusumik ataqatigiinnerusumillu aningaasaqarnikkut aqutsinissaq pisariaqartinneqarpoq. Naalakkersuisut aningaasanik inatsisip imarisaanik allannguisinnaanermik pisinnaatitaaffilerneqassanngillat. Naalakkersuisut pisut ilaanni ukiuni aningaasanut inatsiseqarfiusuni sisamani amigartooruteqartoqarsimatillugu, namminersorlutik oqartussat aningaasaliissutaannik annikilliliisinnaanerat KJ-ip uani eqqarsaatigigaa ilimagineqarpoq. Taamatut annikilliliineq pitinnagu, Naalakkersuisut Aningaasaqarnermut Akileraartarnermullu ataatsimiititaliamik pissarseqqaartussaapput, taamaammallu pineqartumi pisinnaatitaanerpiaq tapiissutitut aningaasaliinernik il.il. akuersinermi ataatsimiititaliap pisinnaatitaaneranut ilaasut isigineqartariaqarpoq. Annertusisamik nalunaarutiginninnissamut pisussaaffik matumani aningaasaqarnermik aqutsinermik pitsaasumik ingerlatsinissamut periarfissamut ataqatigiissillugu isigineqassaaq.

Inatsisissatut siunnersuut kommuninut taamak annertutigisumik sunniuteqartussaag sukumiinerungaartumik piareersarneqarlunilu, inatsisissap piareersarnerani kommuninik annertunerusumik akuliutsitsisimasariaqaraluartoq KJ isumaqarpoq. KJ-ip inatsisissatut siunnersuutip tunuartinneqarnissaa, kommunillu suleqatigalugit suliamik aallartitsisoqarnissaa piumasaraa.

Missingersuusiortarnermut inatsisip saqqummiunneqarnissaanut kommunit arlaleriarlutik akuliutsinneqartarlutillu ilaatigut Politikikkut Ataqtigiissarisut (PKG) aammalu Missingersuutinut Naatsorsuutinullu Siunnersuisooqatigiit aaqutigalugit ilisimatinneqartartut Naalakkersuisut aallaqqaammum tikkuassavaat. Tamatuma saniatigut inatsisissatut siunnersuutip suliarineqarnerani assersuutigalugu kommuninik pitsaasumik akuliutsitsinissaq qulakkeerniarlugu, siunnersuutip Inatsisartut ataatsimiinnerini marlunni suliarineqarnissaa Naalakkersuisut qulakkeerpaat. Taamaalillutik siunnersuutip tunuartinnissaa Naalakkersuisut naapertuussorinngilaat. Naalakkersuisulli kommunit misilittagaasa naalaarnissaat soorunami piareersimaffigaat, taamatullu allat inatsisissap atortuulersinnerata ingerlanerani aamma, taamattaarlu pisariaqartitsineq naapertorlugu allannguutissatut siunnersuutininik inatsisilluunniit annertusineqarneranik saqqummiussisassallutik. Kommunillu ilaatigut Missingersuusiortarnermut Naatsorsuutinullu siunnersuisooqatigiit aaqutigalugit inatsisip atortuulersinneqarneranut sulinermut ilanngutitinneqassapput, tassunga ilanngullugu inatsisip akuerineqarneranut atatillugu kommuninut pingaaruteqartunik nalunaarutininik suliarineqartussat ilusilersorneqarneranni.

Allannguutissatut siunnersuummi aalajangersakkanut ataasiakkaanut nassuiaatit

Nr. 1-imut

Immikkorluinnaq pisoqarsimatillugu piumasaqaatit § 2, imm. 1-mi taaneqartut saneqqunnissaannut akuersissuteqarallarnissamut piginnaatitsissutip Aningaasaqarnermut Akileraartarnermullu Ataatsimiititaliamut tunniunneqarnissaa siunnersuutigineqarpoq. Naalakkersuisunit inassuteqartoqareerneratigut ataatsimiititaliap aalajangigaa aalajangiunneqartassaaq.'

Nr. 2-imut

Naalakkersuisunut ilaasortat akornanni oqartussaaffinnik agguataarinissamut tunngavigineqarlutik malitassanut naapertuuttumik siunnersuutigineqarpoq missingersuusiortarnermi naatsorsuuserinermit suliasap naalakkersuisumit sorlermit aalajangersaaffiginissaanut tunngatillugu tamanna Naalakkersuisut siulittaasuannut tunniunneqassasoq.

Nr. 3-imut

Maannamut imm. 2-jusoq imm. 1-imut ilanngunneqassasoq siunnersuutigineqarpoq, taamaalilluni piumasaqaatit tamarmik immikkoortumut ataatsimut katersorneqassallutik. Peqatigisaanillu nutaamik imm. 2-liortoqassasoq siunnersuutigineqarpoq, tassani taarsigassarsinermit tunngatillugu imaluunniit taarsigassarsinermit akuersissummik nalunaaruteqarnermi piumasaqaatit aamma akiitsunik pisussaaffiliinernut allanut,

qularnaveeqqusiinernut akiligassanngorsinnaasunilluunnit pisussaaffilernerni, aningaasanik attartornermi imaluunniit pisortat namminersortullu suleqatigiilerneranni aamma atortuutinneqarnerata erseqqissarneqarnissaa siunertarineqarpoq.

Akiitsunik allanik pisussaaffeqarnermi ilaatigut aningaasanik pituttuinerit, assersuutigalugu pappiaqqanik nalilinnik aassigisaanillu atortuulersitsinikkut assigisaanillu.

Qularnaveeqqutinik pisussaaffinni ilaatigut taarsigassarsianik assigisaanillu taarsiinissamut qulakkeerisutut (assersuutigalugu qularnaveeqqusiinernit) neriorsuuteqarnerit pineqarput. Akiligassanngorartarsinnaasunik pisussaaffinni ilaatigut aningaasatigut pisussaaffiit aningaasat annertussusaannik qaqugulu akilerneqarumaarnerannik ilisimaneqanngitsut pineqarput. Aningaasatigut attartugassarsiani attartortoq attartornermi aningaasanik aarlerinaammik tigungminnituusarpoq, tamannalu nalinginnaasumik attartornernut (atortunik attartorneq) killumut sammivoq.

Sanaartornermut tunngasuni pisortat namminersortullu peqatigiinnerni (OPP) aaqqissuussinerillu assingusut, soorlu pisortat namminersortullu suleqatigiinneri (OPS), pisortat namminersortullu ingerlataqartut suliniummik ataatsimoorussamik (soorlu umiarsualivimmik, atuarfimmik immaqaluunniit aqqusinermik sananermik) suleqatigiissuteqarnerat ilisarnaataasarpoq, tassanilu akisussaaffik, iluanaarutit aarlerinaatillu piffissami sivisuumi aaqqissuussamik agguarneqarnerat isumaqatigiissutigineqartarpoq. Sanaartornerup pineqartillugit pisortat OPP-millu suleqatigiit il.il. OPP-mik suliniutit il.il. isumaqatigiissummik annertumik aallaaveqartumik, illuatungeriinnilu isumaqatigiissummut tunngasuni pissutsinut pingaaruteqartunut aalajangersaasumik suleqatigiinnermik nalinginnaasumik pilersaarusiornermi, ilusilersuinermi, sanaartornermi, ingerlatsinermi, aserfallatsaaliinermi, aningaasalersuinermilu pissutsinut tamanut (amerlanerpaanulluunniit) attuumasarpog.

OPP il.il. suliariumannittussarsiuussinernilu assigiinngitsunik assigiinngissuteqartoqarpoq:

- Aallaqqaammut OPP il.il.-imi suliniummi pissutsit amerlanerungaartut immikkoortullu suliariumannittussarsiuussinermi, nalinginnaasumik ingerlatsinermi iluarsartuussinermilu suliasami killilerluakkamut tunngasumit immikkoortut amerlanerusut eqqarsaatigineqartarput.
- Aappassaattut OPP il.il.-ini piffissaq sivusunerungaartoq pineqartarpoq. Suliariumannittussarsiuussinerni nalinginnaasumik ukiut pingasut sisamalluunniit pineqartartut, OPP il.il.-ini piffissaq sivusunerungaartoq pineqartarpoq.
- Pingajussaattut OPP-mik suliniutini il.il. isumaqatigiissutip ingerlanerani suliniutip aningaasalersorneqarnissaanik isumaqatigiissuteqartoqartarpoq.

Ukiuni kingullerni OPP-mik periuseq nutaaq, periusaasumik OPP annertusiartortumik sammineqalerpoq. Taamaaliornermi amerlasuutigut pisortatut oqartussaasut suliffeqarfilluunniit imaluunniit suliffeqarfiit namminersortut ataatsimut suliffeqarfimmik pilersitsisarput. Periusissiamik OPP-p isumaqatigiissuteqarnermillu toqqammaveqartumik

OPP-p assignngissutaat tassaavoq, periusissiamik OPP-mik pilersitsinermut atatillugu piffissaq pineqartoq annertusiniarneqartarmat, taamaalillunilu aarlerinaatinik, akisussaaffinnik iluanaarutaasinnaasunillu avitseqatigiinneq pitsaanerusoq anguniarneqartarluni. Periusaasumik OPP-mik aaqqissuussinerit aalajangersakkami aamma pineqarput.

OPP il.il.-imi aarlerinaatinik avitseqatigiinneq qitiusumik inissisimavoq. OPP-mik suliniutini il.il. aarlerinaatinik avitseqatigiinnermi aarlerinaatit ataasiakkaat tamarmik peqataasumit aarlerinaammik pineqartumik sunniuteqarnissamik iliuuseqarfiginninnissamillu isumagineqartarnissaat periuserineqartarpoq.

Makku immikkoortinneqartarput:

- *Sanaartornermi aarlerinaat (construction risk)*: Piffissamik pilersaarutini malinninnissamut, sanaartornermi missingersuutini aamma/immaqa sanaartukkap pitsaassusaanik isumaqatigiissutini, aningaasartuutaanerusussanik, teknikikut kukkussutini il.il. tunngasunik aarlerinaatinut tunngavoq. Pisortat OPP-mi peqataasut, namminersortunut peqataasunut akiliinissamik pisussaaffiat aatsaat sanaartukkap atulernerani isumaqatigiissutaasutullu pitsaassuseqaraangat, nalinginnaasumik sanaartornerup nalaani aarlerinaammik tigumminittuuneq ajorput.
- *Piumannittoqarnerani aarlerinaat (demand risk)*: OPP-mik suliniutip atulereernerani piumannittoqarnerata allangorarneranut aarlerinaammut tunngavoq; assersuutigalugu eqqoriaataaqaartunit timmisartumik ilaasut ikinnerusut mittarfimmik atuinerini. Pisortani peqataasoq piumannittoqarnerani ineriartornivik apeqqutaatinnagu OPP-mik peqataasunut aningaasanik aalajangersimasunik akiliisarnissamik pisussaaffeqaraangat, pisortat peqataasut piumannittoqarnissaanik aarlerinaat nammattarpaat.
- *Pissarsiarisinnaaneranut aarlerinaat (availability risk)*: Inaarutaasumik ingerlatsinermi pitsaassutsimut annertussutsimut aarlerinaammut tunngavoq, assersuutigalugu namminersortup OPP-mik peqataasup tungaanit aqutsinerliortoqarneranik pitsaanngitsumillunniit naammassinnittoqarnerani. Tamanna assersuutigalugu aserfallatsaaliinerit amigaataanerat imaluunniit torersaaneq eqqilutsitsinerulluunniit amigarnera pissutigalugu mittarfiup tamakkiisumik matoqqaneranut tunngasinnaavoq. Naammassinninnerit pitsaanngitsut patsisaallutik OPP-mik ingerlatamut akiliutit apparpata, namminersortut peqataasut pissarsiarisinnaaneranut aarlerinaatip annertunersaa nammattarpaat, akerlianilli pisoqarpat aarlerinaatit pisortani peqataasunut inissisimassapput.

Aarlerinaatinik avitsinerit OPP-millu suliniutini il.il. piginnittuunerit OPP-mik suliniutit il.il. naatsorsuutit oqimaaqatigiinneranni pisortanut namminersortunulluunniit piginneqataasunut nalunaarsornissaanut pingaarutilimmik inissisimasarpoq.

Naalackersuisut imm. 3-mi taarsigassarsisoqarnerani, qulaarnaveeqqusiisoqarnereani, attartornermi isumaqatigiissuteqarnermi, OPP-nik isumaqatigiissuteqarnermi il.il. aamma

taarsigassarsiniarnerit, qularnaveeqqusiinerit, attartornermik isumaqatigiissutit, OPP-mik isumaqatigiissutit il.il. akuersissutigisarnerinut nalunaarut aqutigalugu piginnaatinneqassasut siunnersuutigineqarpoq. Aalajangersakkami kommunit aamma namminersorlutik oqartussat aningaasaliinissanut taarsigassarsiniarsinnaanerit il.il. siunertarineqarpoq. Naalakkersuisuttaaq suliffeqarfiit, peqatigiiffiit, aningaasaateqarfiit il.il. § 1-imi ilaatinneqartut akuersissuteqartoqarnissanut qanoq qinnuteqarsinnaanerannut malittarisassanik aalajangersaassapput.

Nr. 4-imut

Aalajangersakkap oqaasertaliornerata atugassarisatigut pissuteqartumik sukateriffiginissaa siunnersuutigineqarpoq, taamaaliornikkut immikkorluinnaq pisoqarsimatillugu inatsit atuuttoq oqaasertaliussat akuersissutiginerat aqutigalugu allanngortinneqarsinnaanngorlugu. Taamaaliornermi inatsisit atuutereersut aningaasanut inatsimmi oqaasertaliussat aqutiginagit, nalinginnaasumilli inatsisissatut siunnersuutip akuersissutigineratigut allanngortittarnissaat eqqarsaataavoq.

Nr. 5-imut

Sanaartugassanut Iluarsagassanullu Aningaasaateqarfiup atorunnaarnissaata kinguneranik qulequtaq allanngortinneqassasoq siunnersuutigineqarpoq.

Nr. 6-imut

Aningaasanut inatsisissatut siunnersuummut sanaartugassanut iluarsagassanullu suliassat pilersaarusiornernut aningaasaliissummik imaluunniit immikkoortitaartunik arlalinnik anignaasaliissutinik ilanngussisoqassasoq siunnersuutigineqarpoq.

Pilersaarutitut aningaasaliissutini ilaapput suliassat tamarmik immikkoortunut pilersaarutip pigineqalerneraniit suliarineqartussat, entreprenørimiillu neqeroorutivimmik pigisaqartoqalernissaa tikillugu (missingersuutit A-t).

Ukiunut missingersuusiorfiusunut ilaatigut aningaasartuutit pilersaarusiornernut tunngassuteqartut ukiumi aningaasanut inatsiseqarfiusumi atorneqartussat, ilaatigullu immikkoortunut pilersaarutit tunngavigalugit pilersaarusiornernut aningaasartuutissatut ilimagisat ilanngunneqassapput.

Naalakkersuisut sanaartorneqartussat iluarsagassallu suliarinissaannut aningaasaliissutit, aningaasaliissutilluunniit arlallit aningaasanut inatsisissatut siunnersuummut ilannguttassagaat siunnersuutigineqarportaaq.

Aningaasaliissutini ilaapput aningaasartuutit tamarmik pilersaarusernerit naammassereernerisigut sanaartorneqartussat iluarsagassallu naammassinissaat tikillugu ukiumut aningaasanut inatsiseqarfiusumut ilanngunneqartussatut naatsorsuussat, takuuk aalajangersakkani imm. 1, Aningaasartuutit ukiunut aningaasanut inatsiseqarfiusunut kingusinnerusunut tunngasut ukiunut missingersuuserfiusunut ilanngunneqassapput. Assinganik pilersaarusernerit tunngavigalugit ukiuni missingersuuserfiusuni aallartitanut aningaasartuutissatut ilimagisat ilanngunneqassapput.

Inatsisartut Naalakkersuisullu pillugit Inatsisartut inatsisaanni § 16, imm. 2 malillugu sanaartugassat iluarsagassallu suliarinissaannut ilassutitut aningaasaliissutinik Aningaasaqarnermut Akileraartarnermullu Ataatsimiititaliap akuersissuteqarsinnaanera aalajangersakkatigut aporfissaqanngilaq.

Nr. 7-imut

Illuutitut aalaakkaasunut, sanaartorneqartunut sulianullu allanut namminersorlutik oqartussat aningaasaliineritut aningaasaliissutissanut Aningaasanut Inatsisissatut Siunnersuut siunnersuutinik imaqassasoq siunnersuutigineqarpoq. Aningaasaliissummi illuutinik aalaakkaasunik allanillu sanaartorneqartunik suliarineqartunillu allanik - soorlu umiarsuarnik - pisinerit, tunisinerit paarlaaqatigiinnerillu pineqarput.

Sanaartortitsinissanut iluarsagassanillu suliassanut taarsigassarsititsinissamut neriorsuinissamut aningaasaliissutissanik aningaasanut inatsisissatut siunnersuut imaqassasoq siunnersuutigineqarportaaq.

Assinganik siunnersuutigineqarpoq sanaartortitsinissanut iluarsagassanillu suliassanut tapiissutitut aningaasaliissutissanut aningaasanut inatsisissatut siunnersuut siunnersuummik imaqassasoq siunnersuutigineqarpoq.

Nr. 8-imut

Sanaartortitsinissat iluarsagassallu namminersorlutik oqartussanik suliarineqartussat pilersaaruserinissaannut, sanaartortitsinissat iluarsagassallu suliarinissaannut, illuutitut aalaakkaasunut sulianullu allanut aningaasaliinernut, sanaartortitsinissanut iluarsagassanullu tunngatillugu taarsigassarsititsinissanut neriorsuinerit kiisalu sanaartortitsinissanut iluarsagassanullu aningaasaliissutit atornissaannut ukiumoortumik nassuiaammik suliartarnissaannik Naalakkersuisut peqquneqassasut siunnersuutigineqarpoq. .

Pilersaarutitut ataasiakkaanut killiffinnut naatsorsuutit, aningaasartuutinik isertitanillu naatsorsuutitalit nassuiaammut ilanngunneqassapput. Aamma nassuiaammik takuneqarsinnaassapput suliniutit sorliit aatsaat aallartinneqarnerisut, sorliit suli

ingerlanneqarnersut, sorliit naammassineqarsimanersut imaluunniit
unitsiinnarneqarsimanersut.

Nr. 9-imut

Aningaasaliissutini § 14 aamma § 15-imi ilanngunneqartunik ukiumut aningaasanut
inatsiseqarfiusumut allamut nuussisoqarsinnaanera pillugu Naalakkersuisut malittarisassanik
aalajangersaasinnaanissaannut piginnaatinneqarnissaat siunnersuutigineqarpoq. Nuussineq
aatsaat pisinnaassaaq atuinikinnerusoqarneranut sanaartortitsinissat iluarsagassallu
suliarinissaannut kinguaattoornerit pissutaasimappata. Sanaartornerup sukkassusaatigut
nikerarnermik pilersoqarpat aalajangersagaq atorneqarsinnaassaaq.

Nr. 10-imut

Naalakkersuisunut ilaasortat akornanni oqartussaaffinnik agguasarnernut
tunngavigerpiarneqartut naapertorlugit suliasanik naalakkersuisup sorliup
isumaginninnissaata aalajangersaaffiginissaanut piginnaatitsissut Naalakkersuisut
Siulittaasuanit isumagineqalissasoq siunnersuutigineqarpoq.

Nr. 11-imut

Kommuninut ataatsimoortumik tapiissutit pillugit isumaqatigiissummi siunertanut
aalajangersimasunut aningaasanik immikkoortitsisoqarsimappat kommunit ukiumoortumik
missingersuuteqarnerminni minnerpaamik aningaasanik amerlaqataanik suliasanut
taakkununga immikkoortitsisarnissaat siunnersuutigineqarpoq.

Nr. 12-imut

Ukiumoortumik missingersuutissanut siunnersuutit siullermeerneqarnissaanut
appasaaneerneqarnissaanullu kommunalbestyrelsimi ilaasortanut nassiunneqarnera
peqatigalugu kommunip nittartagaatigut tamanut saqqummiunneqartassasoq
siunnersuutigineqarpoq. Matumani eqqarsaataavoq kommunalbestyrelsimi ilaasortanut
nassiussisarnermut piffissaliussaq suleriaatsimi aalajangersarneqarsimammat.

Ukiumoortumillu missingersuutinut siunnersuut Naalakkersuisunut ilisimatitsissutitut
nassiunneqassaaq. Aallaaviatigut siunnersuutip naalakkersuisumut kommunini
aningaasaqarnermik nakkutilliinermut akisussaasumut nassiuttarnissaa naatsorsuutaavoq -
massakkullu tassaavoq Aningaasaqarnermut Akileraartarnermullu Naalakkersuisoq.

Nr. 13-imut

Aalajangersagaq pisortat namminersortullu peqatigiinnerannut (OPP) il.il. tunngasumik ilaqaalersillugu annertusineqarnissaa siunnersuutigineqarpoq, takuuk allannguutissatut siunnersuummi nr. 3-mi nassuiaatit (inatsisissatut siunnersuutip § 6-ia).

Taamattaarlu Naalakkersuisut malittarisassanik, kommunit sinaakutissatut aalajangersakkat iluanni, Naalakkersuisunit siumoortumik akuersisummik piniaqqaarnatik attartorsinnaanerannik il.il. periarfissiisumik aalajangersaanissaannik peqquneqarput.

Nr. 14-imut

Aalajangersakkat oqaasertalernerisa allanngortinnissaat siunnersuutigineqarpoq, taamaaliornikkut Naalakkersuisunut ilaasortat ataasiakkaat pinnatik Naalakkersuisut suliassamik isumaginnittassammata.

Taamatuttaaq missingiinerup ukiup aningaasanut inatsiseqarfiusup sinnerani aningaasartuutaajunnartunik tunngaveqarnissaa erseqqissaqquneqarpoq. Missingiineq sapinngisamik amerlassutsinut immikkoortunullu aningaasartuutinut ilisimaneqartunut ilimagisanullu naapertuutsinniarneqassaaq.

Nr. 15-imut

Naalakkersuisunut ilaasortat akornanni oqartussaaffinnik agguaasarnermi tunngavigerpiarneqartunut naapertuuttumik piginnaatitsissummi naalakkersuisup sorliup siusissukkut nakkutiginninnermik isumaginnittussaanera Naalakkersuisut Siulittaasuannut tunniunneqassasoq siunnersuutigineqarpoq. Namminersorlutik Oqartussanut tunngatillugu aningaasaliissutissanik killiliinissamat aalajangersaasarnermut piginnaatitaaffiup Naalakkersuisumut tunniunneqarnissaa aamma siunnersuutigineqarpoq.

Nr. 16-imut

Naalakkersuisunut ilaasortat akornanni oqartussaaffinnik agguaasarnermi tunngavigerpiarneqartunut naapertuuttumik piginnaatitsissummi naalakkersuisup sorliup siusissukkut nakkutiginninnerup suliassartaanik isumaginnittussaanera Naalakkersuisut Siulittaasuannut tunniunneqassasoq siunnersuutigineqarpoq. Namminersorlutik Oqartussani aningaasartuutinik siusissukkut nakkutiginnittarnissat akulikinnerusumik pisariaqartitsinerlu naapertorlugu Naalakkersuisunit ingerlanneqassappata taamatut aalajangiisoqarnissaanut immikkut ittumik tunngavissaqartariaqarpoq. Taamaammat aalajangersakkap kommuninuinnaq atuunnissaa siunnersuutigineqarpoq.

Nr. 17-imut

Aalajangersakkap oqaasertaliornera allanngortinnissaa siunnersuutigineqarpoq, taamaalillunilu aningaasaqarnermut naalakkersuisoqarfik suliassamik suliarinninnani Naalakkersuisut suliarinnittussanngorlugit.

Nr. 18-imut

Kingusinnerusukkut aningaasartuutinik nakkutiginnittarneq missingersuutit oqimaaqatigiinnissaannik § 2-mi piumasaqaat assigalugu ukiut 4-kkaarlugit ingerlanneqartassasoq siunnersuutigineqarpoq.

Aalajangersakkap oqaasertaliornera allanngortinnissaa siunnersuutigineqarpoq, taamaalillunilu aningaasaqarnermut naalakkersuisoqarfik imaluunniit aningaasaqarnermut naalakkersuisoq suliassamik suliarinninnani Naalakkersuisut suliarinnittussanngorlugit.

Nr. 19-imut

Kingusinnerusukkut aningaasartuutinik nakkutiginnittarneq missingersuutit oqimaaqatigiinnissaannik § 2-mi piumasaqaat assigalugu ukiut 4-kkaarlugit ingerlanneqartassasoq siunnersuutigineqarpoq. Kommuniip naatsorsuutai ukiunut aningaasanut inatsiseqarfiusunut 4-nut siuliinut isertitanut sanilliullugu 2,5 procent sinnerlugu amerliartorfiusumik amigartoorfiusut Namminersorlutik Oqartussat kommuninut ataatsimoortumik tapiissutai ilanngarneqassapput. Ukiuni aningaasanut inatsiseqarfiusuni pineqartuni isertitat 2,5 procent qaangerlugu amigartoorfiusimappata ukiumi aningaasanut inatsiseqarfiusumi siullermi aningaasat 40 procentiinik ilanngaasoqassaaq. Ukiuni aningaasanut inatsiseqarfiusuni pineqartuni isertitat 2,5 procent qaangerlugu amigartoorfiusimappata ukiuni aningaasanut inatsiseqarfiusuni tulliuttuni 3-ni aningaasat 20 procentiinik ilanngaasoqassaaq.

Ukiuni aningaasanut inatsiseqarfiusumi siullermi ukiumi tapiissuteqarfiusumi ilanngaaneq qaammatini juulimi, aggustimi, septembarimi, oktobarimi, novembarimi decembarimilu assigiimmik akilersorneqassaaq. Aningaasanut inatsiseqarfiusumi tullermi ilanngaaneq ukiumi qaammatini 12-ini assigiimmik akilersorneqassaaq.

Aammattaaq aalajangersakkap oqaasertaliornera allanngortinneqassasoq siunnersuutigineqarpoq, taamaaliornikkut aningaasaqarnermut naalakkersuisoqarfik suliarinninnani Naalakkersuisut suliassamik suliarinnittussanngorlugit.

Nr. 20-imut

Iisimatitsissutip Aningaasaqarnermut Akileraartarnermullu Ataatsimiititaliamut nassiunnerata saniatigut Kukkunersuineranut Ataatsimiititaliamut aamma nassiunneqarnissaa siunnersuutigineqarpoq.

Tamatuma saniatigut §§ 14 aamma 17-imi aningaasaliissutini taaneqartuni atuinernut tunngasut pillugit immikkut killiffimmik ilisimatitsissutip imaqarnissaata erseqqissaaffiginissaa siunnersuutigineqarpoq.

Nr. 21-imut

Naalakkersuisut taarsigassarsianut allatullu akiitsoqarfinnut kommunit aamma namminersorlutik oqartussat naatsorsuisarnissaannut malittarisassanik aalajangersaanissamut piginnaatitaanissaat siunnersuutigineqarpoq, soorlu pisussaaffioratarsinnaasut, pisortat namminersortullu peqatigiinnerannik, attartortitsinissamut isumaqatigiissutit il.il., taakkuninngalu aningaasaqarnermut naalakkersuisoqarfimmut nalunaaruteqartarnissaq. Naalakkersuisut tamatumani § 1-imi suliffeqarfiit, peqatigiiffiit, aningaasaateqarfiit il.il. naatsorsuutitut qanoq annertutigisumik ilanngunneqartassanersut pillugit malittarisassanik aalajangersaasinnaapput.

Naalakkersuisup taassuma Naalakkersuisut siulittaasuata erseqqinnerusumik aalajangersaaneratigut tamatumunnga piginnaatinneqartup nakkutilliinissamut atugassanik paasissutissanik kommuninut piniarsinnaaneranut Naalakkersuisut aalajangersaasinnaapput.

Nr. 22-imut

Kommunit immikkut Missingersuusiornermut Naatsorsuusiornermullu Siunnersuisoqatigiinni sinniisussamik toqqaasarmata KANUKOKA-p siunnersuisoqatigiinni sinniisooqartitsinissaa pisariaqartutut isigineqanngilaq.

Nr. 23-imut

Aalajangersakkap erseqqissaaffiginissaa siunnersuutigineqarpoq, taamaaliornikkut takuneqarsinnaaniassammat Nunatta Karsiata Naatsorsuutaasa Kukkunersioqartarnerannut Ataatsimiititaliap paasissutissanik piniartarnera assigalugu kukkunersiuisoq naalagaaffimmit akuerisaaq paasissutissanik pissarsinnaassammat, takuuk Inatsisartut Naalakkersuisullu pillugit Inatsisartut inatsisaanni § 18 aamma 19.

Nr. 24-imut

Nationalbanken suliffeqarfiummat imminut pigisoq aalajangersimasumullu attuumassuteqanngitsoq ilimananngilaq aningaaserivik Kalaallit Nunaanni Aningaasaqarnermut Siunnersuisoqatigiinnut allattoqarfittut atuuteqqullugu peqquneqarsinnaassasoq. Taamaammat allattoqartitsineq aningaasaqarnermut naalakkersuisoqarfimmiinnaq isumagineqassasoq siunnersuutigineqarpoq. Allattoqarnerup isumaginissaanut ikiorteqarnissaaq pillugu aningaasaqarnermut naalakkersuisoqarfiup Nationalbankenimik imaluunniit peqataasunik allanik isumaqatigiissuteqarnissaa aalajangersakkatigut ammaffigineqarpoq.

Nr. 25-imut

Kapitali 8-mi qulequttap "pineqaatissiinerit"-mut allanngortinnissaa siunnersuutigineqarpoq.

Nr. 26-imut

Kommunit aqunneqarnerat pillugu Inatsisartut inatsisaanni kommunalbestyrelsimut ilaasortat arlaatigut pissutissaqarpat pinngitsaaliissummik akiliisitsinissamik imaluunniit akiliisitsinissamik pineqaatissinneqarsinnaapput. Kommunit aningaasaqarnikkut ingerlatsinerannut atatillugu pisussaaffinnik suliaqarusuttoqanngitsillugu imaluunniit ajortumik saneqqutsisoqartillugu malittarisassat atuuttut malillugit assinganik annertoqataanilluunniit kommunalbestyrelsimi ilaasortanut pinngitsaaliissummik akiliisitsisoqarnissaanik imaluunniit akiliisitsinissamik peqqusisoqarnissaanik Nakkutilliisoqarfiup peqqusisinaanissaa siunnersuutigineqarpoq.

Nr. 27-imut

Atuutilersitsinermik aamma ikaarsaariarnermi aalajangersakkanik qulequtserlugu kapitali 9-mik nutaamik ilanngussisoqassasoq siunnersuutigineqarpoq.

Nr. 28-imut

Inatsisartut inatsisaata aallaaviatigut 1. januar 2018 atuutilissasoq siunnersuutigineqarpoq. Taamaattoq §§ 14-17-ip nalunaarut aqutugalugu atuutilissasut siunnersuutigineqarpoq. Matumani malugeqquneqarpoq sanaartortitsinerit iluarsaanerillu aqqissuussinermut nutaamut nuunneranni allaffissornikkut unammilligassat eqqarsaatigalugit Namminersorlutik Oqartussat aningaasaqarnermik aqutseriaatsimut nutaamut ikaarsaarnerannut ataqatigiissaartariaqarmat .

Saniatigut siunnersuutigineqarpoq naatsorsuuserinermut tunngatillugu Piffissamut ungasinnerusumut Aningaasaliisarnissanut Aningaasaateqarfimmut tunngatillugu § 18 1. juli 2016 atuutilissasoq, taamaalilluni ulloq taanna aallartiffigalugu isertitat pissarsiarineqartut aningaasaateqarfimmut ilanngunneqarsinnaalersillugit. Immikkoortumut tassunga tunngatillugu inatsit kingumoortumik atuutilissaaq.

§ 26, imm. 3-5, aamma §§ 27-30 1. januar 2019 atuutilissasut siunnersuutigineqarpoq, matumani aalajangersakkani taakkunani pisariaqarmat inatsimmi aalajangersakkat ilaat ukiumi 1-mi atuussimanissaat.

Ulloq 1. januar 2018 Namminersorerullutik Oqartussat naatsorsuuseriveqarnerat il. il. aamma Namminersorerullutik Oqartussat missingersuutaat pillugit inatsisit atuuttut

atorunnaarsinneqassapput. Aamma Kommunit aqunneqarnerat pillugu Inatsisartut inatsisissaanni §§ 40-50 atorunnaarsinneqassapput.

Inatsisini aalajangersakkanilu taaneqartuni imm. 5-imiittut malillugit nalunaarutit atortussanngortinneqartut Inatsisartut inatsisaat manna malillugu nalunaarutitik atortussanngortinneqartunik taarserneqarnissaat tikillugu atuutiinnassasut siunnersuutigineqarpoq.

Ilanngullugu sanaartortitsinernut iluarsaanernullu aaqqissuussinerup nutaap atuutilernerata kingorna ukiut 5-t qaangiunnerisigut Sanaartugassanut Iluarsagassanullu Aningaasaateqarfik ulloq 31. december atorunnaassasoq siunnersuutigineqarpoq. Suliassat aningaasaateqarfiup iluani aallartinneqarsimasut aaqqissuussinerup nutaap atuutilernissaata tungaanut naammassiniarlugit ikaarsaariarneq atorneqassaaq.

Tassunga atatillugu Naalakkersuisut Sanaartornermik Iluarsartuussisarnermillu aningaasaateqarfiup atorunnaarsinnissaanut malittarisassanik erseqqinnerusunik aalajangersaasinnaapput, tassunga ilanngullugu aningaasaateqarfiup ataani sulianik atorunnaarsitsinernut atatillugu ikaarsaarnermi aaqqissuussinernik aningaasaateqarfiullu aningaasaataanik nuussinernik aalajangersaanerit.